

Indra Stamper ganado di festival Bernadina Growell-Kock



DIASABRA den un centro di barío yena cu hende 5 agrupacion musical a competi pa saca un ganado p'e festival organisa pa fundacion Bernadina Growell-Kock. E festival aki a ser dedica na un gran baluarte di tambu, sr. Vicente Ras di 93 aña di edad, kende despues di a ricibi su homenahe a dedica 2 cancion na su pueblo.

E Maximo ganado di e festival a resulta sra. Indra Stamper cu e agrupacion musical "Tradicion Musical" cu e cancion titula Lamento Rubiano di e compositor sr. Vicente Ras. Indra a conecta cu publico y a haya su apoyo. Na segundo luga a resulta sr. Angelo Koolman cu e agrupacion Tipico Pegasaya cu cancion titula "Loco Loco" di e compositor Bernadina Growell-Kock dfm. Angelo tambe a pone e publico gosa y na tercer luga a resulta sra. Lucia Thiel cu agrupacion musical "Sodo y Cuero" cu e cancion titula "Le-le-la" di compositor Bernadina Growell-Kock dfm. Lucia su voz ta zona manera di Bernadina y pueblo a biba cu su cancion.

Fundacion Bernadina Growell-Kock ta agradecido cu e apoyo cu e festival y tur e otro festivalnan ta ricibi den pueblo. Danki n'e agrupacionnan musical y cantantenan pa nan participacion asina bunita y anima. Ta gradicido alabes n'e sosten cu a ricibi di Departamento di Cultura, Setar y Banco di Caribe. Tambe n'e publico cu ta tuma tempo pa bin n'e festival.

Fundacion kier gradici yiunan di Vicente, especial Orion's, nietonan, special Jeremy y Marcia Stamper pa nan sosten cu informacion y transporte pa cu Vicente por a ricibi su homenahe.

Alabes fundacion ta extende palabranan di gratitud na nos prensa cu a sabi di sosten e evento aki tanto pa medio di cobertura di e conferencia di prensa como pa medio di presencia durante e evento.

